

# Vedtekter for Vestland SV

## § 1:

Desse vedtektene gjeld for Vestland Sosialistiske Venstreparti. Vestland SV er fylkeslag i Sosialistisk Venstreparti og omfattar dei tidlegare fylkeslaga Hordaland SV og Sogn og Fjordane SV.

## § 2:

Vestland SV har følgjande organ:

- a. Fylkesårsmøte
- b. Fylkesstyre
- c. Arbeidsutval
- d. Nominasjonsmøte
- e. Regionmøte for Hordaland og for Sogn og Fjordane
- f. Utval og nemnder sett ned av fylkesårsmøtet eller fylkesstyret

## Kapittel I: Fylkesårsmøtet

### § 3: Fylkesårsmøtet

Fylkesårsmøtet er det høgste organet i fylkeslaget. Det vert halde fylkesårsmøte ein gong i året, innan utgangen av februar og alltid framkant av landsmøtet.

#### §3.1 Innkalling til fylkesårsmøte

Fylkesstyret kallar inn til fylkesårsmøte. Kunngjering må sendast lokallaga seinast 30 dagar før møtet. Lokallaga eller enkeltmedlemmer som ønskjer å reise saker på fylkesårsmøtet, må sende framlegg til fylkesstyret seinast 14 dagar etter kunngjering. Innkalling til årsmøtet med dagsorden må sendast ut seinast ei veke før møtet.

#### § 3.2 Samansetjing av fylkesårsmøtet

Lokallaga får 1 utsending for kvar påbyrja 30 medlemmer. Det sentrale medlemsregisteret til SV den 31.12 året før fylkesårsmøtet vert lagt til grunn for utrekninga.

Ingen lokallag kan likevel ha meir enn 40% av det samla talet på moglege lokallagsrepresentantar.

Fylkesstyret deltek med fulle rettar på fylkesårsmøtet. Fylkesstyret har ikkje røysterett i saker som gjeld rekneskap.

Sosialistisk Ungdom kan møte med inntil 10 representantar med fulle rettar. SU avgjer sjølv valordninga for desse.

Fylkesårsmøtet er elles ope for alle medlemmer i fylkespartiet. Fylkesårsmøtet kan i kvart enkelt høve tildele talerett.

### **§ 3.3 Handsaming av saker**

Fylkesårsmøtet godkjenner innkallinga til møtet, vel møteleiar, referent, to protokollunderskrivarar, minst ei redaksjonsnemnd og vedtek dagsorden for møtet som sak 1. Fylkestyret har ansvar for å førebu og legge fram årsmelding, revidert rekneskap, arbeidsplan, budsjett og innkomne framlegg. Fylkesårsmøtet skal minst handsame årsmelding, revidert rekneskap, arbeidsplan, budsjett, innkomne framlegg og velje fylkestyre og to revisorar.

Annakvart år vel fylkesårsmøtet etter framlegg frå fylkestyret ei nominasjonsnemnd. Året før fylkestingsval vel fylkesårsmøtet ei programnemnd. I år med landsmøte vel fylkesårsmøtet landsmøtedelegasjon med liste over varamedlemmer etter framlegg frå fylkestyret. I år med fylkestingsval handsamar fylkesårsmøtet fylkespolitiske hovudprioriteringar og valprogram for den kommande valperioden.

Protokoll for fylkesårsmøtet skal sendast protokollunderskrivarane innan to veker. Protokollen skal vere underskriven og godkjent etter fire veker. Protokollen skal deretter gjerast kjent på høveleg vis, sendast til lokallaga og til SV sentralt.

### **§ 3.4 Valnemnd**

Fylkesårsmøtet vel valnemnd etter framlegg frå fylkestyret. Valnemnda vert valde for årsmøteperioden og skal ha minst 5 medlemmer. Medlemmene av valnemnda vert valde for 2 år. Det skal gjerast ei rullering slik at det vert vald minst to nye medlemmer kvart år. Leiar vert vald av fylkesårsmøtet. Fylkestyret tilrår medlemmer til valnemnda.

Valnemnda tilrår medlemmer og varamedlemmer til fylkestyret og revisorar.

### **§ 3.5 Nominasjonsnemnd**

Fylkesårsmøtet vel nominasjonsnemndene. Valprosessen er omtalt i kap. III og kap. IIII. Nominasjonsnemnda for fylkestinget skal ha 5 medlemmer og god geografisk spreiding.

## **Kapittel II: Fylkestyret**

### **§ 4.1 Fylkestyrets ansvar og oppgåver**

Fylkestyret vert valt av fylkesårsmøtet og står til ansvar overfor fylkesårsmøtet. Fylkestyret er ansvarleg for den daglege drifta av fylkeslaget. Fylkestyret har ansvar for å følgje opp vedtak i program og planar vedtekne på fylkesårsmøtet, og følgje opp dei politiske målsettingane frå fylkesårsmøtet. Fylkestyret skal verke som eit samordnande organ for å styrke det politiske arbeidet i lokallaga og partiet. Fylkestyret skal leggje til rette for at så mange som råd av våre medlemmer og lokale lag deltek i utforminga av politiske budskapen og arbeidsområda.

### **§ 4.2 Samansetjing av fylkestyret**

Til å leie fylkeslaget si verksemd vel fylkesårsmøtet eit styre med leiar,

politisk nestleiar,  
organisatorisk nestleiar,  
økonomiansvarleg,  
kvinnepolitisk ansvarleg,  
fagleg ansvarleg,  
folkevald ansvarleg,  
miljøpolitisk ansvarleg,  
distriktspolitisk ansvarleg,  
ein representant frå SU,  
i tillegg til tre styremedlemer.

Styremedlemmene vert valde for 2 år. Ein skal søkje å få til ei rullering slik at om lag halvparten av styremedlemmene er på val kvar år. Fylkesleiar og to nestleiarar skal veljast ved særskilt val. Vala til leiar- og nestleiaroppgåva gjeld for eitt år i gongen.

Fylkesårsmøtet gjer framlegg om landsstyrerepresentantar med tre vararepresentantar for landsmøteperioden. Landsstyrerepresentantane skal vere medlem av fylkestyret.

#### **§ 4.3 Omsyn til representasjon**

Fylkestyret si samansetjing skal sikre ein breiast mogleg representasjon. Kjønnfordelinga skal vere minst 40% kvinner. SU nemner sjølv opp sin representant med varamedlemmer til fylkestyret.

#### **§ 4.4 Deltakarar med tale- og framleggsrett**

Fylkestingsgruppa har ein medlem med fulle rettar i fylkestyret. Stortingsrepresentantar for SV frå Hordaland og Sogn og Fjordane har tale- og framleggsrett i fylkestyret.

#### **§ 4.5 Vedtak i fylkestyret**

Minst halvparten av dei fylkesårsmøtevalde fylkestyremedlemmene må vere til stades om fylkestyret skal gjere vedtak. Ved likt røystetal i fylkestyret tel leiar si røyst dobbelt.

#### **§ 4.6 Arbeidsutval**

Fylkestyret har eit arbeidsutval som består av leiar, organisatorisk nestleiar og politisk nestleiar. Økonomiansvarleg har tale- og framleggsrett. AU i fylkestyret har fullmakt til å uttale seg på vegner av fylkestyret mellom styremøta. Viktige prinsipielle saker bør leggjast fram for fylkestyret.

#### **§ 4.7 Utvida fylkestyremøte**

Fylkestyret kallar inn til utvida fylkestyremøte ein til to gonger i året, når det er trong for det eller når minst 1/3 del av lokallaga ber om det. Kvart lokallag kan møte med ein representant i desse møta som i regelen er elektronisk oppkopla.

#### **§ 4.8 Utval og nemnder**

Om fylkestyret ser at det er trong for å få løyst ulike oppgåver, kan dei opprette utval eller nemnder.

## **Kapittel III: Nominasjon til fylkestinget**

### **§ 5 Nominasjon til fylkestinget**

Til å stå for nominasjonen har fylkeslaget ei nominasjonsnemnd og eit nominasjonsmøte.

#### **§ 5.1 Val av nominasjonsnemnd**

Fylkesstyret legg fram tilråding på medlemmer i nominasjonsnemnd for fylkesårsmøtet året før valåret. Fylkesårsmøte vel nominasjonsnemnda.

#### **§ 5.2 Ansvar og oppgåver**

Før nominasjonsnemnda utarbeider sitt fyrste framlegg til valliste skal lokallaga og medlemmer ha høve til å kome med framlegg og innspel til nemnda. Nemnda sitt førsteutkast skal sendast på høyring til lokallaga med rimeleg tilbakemeldingsfrist, før nemnda kunngjer sitt siste framlegg til valliste.

Nominasjonsnemnda sitt endelege listeframlegg skal vere lokallaga i hende seinast 14 dagar før møtet. Elles gjeld dei reglane for nominasjon og listeinnlevering som er gjevne i vallova eller i forskrifter til vallova.

#### **§ 5.3 Innkalling til nominasjonsmøte**

Fylkesstyret kallar inn til nominasjonsmøte. Kunngjering må sendast lokallaga seinast 30 dagar før møtet. Nominasjonsmøte skal haldast som eige sær møte i tilknytning til fylkesårsmøtet i valår.

#### **§ 5.4 Samansetjing av nominasjonsmøtet**

Nominasjonsmøtet vert sett saman etter same fordelinga som for fylkesårsmøtet.

## **Kapittel IIII: Nominasjonsarbeidet framfor Stortingsval**

### **§ 6 To valdistrikt ved stortingsval**

Så lenge Hordaland og Sogn og Fjordane held fram som to valdistrikt vil det bli halde eitt nominasjonsmøte for kvart valdistrikt.

#### **§6.1 Val av nominasjonsnemnd**

Fylkesstyret legg fram tilråding til to nominasjonsnemnder for fylkesårsmøtet året før valåret. Berre utsendingane frå Sogn og Fjordane har røysterett i val av nominasjonsnemnd for Sogn og Fjordane, og berre utsendingane frå Hordaland har røysterett i val av nominasjonsnemnd for Hordaland.

#### **§6.2 Ansvar og oppgåver**

Før nominasjonsnemndene utarbeidar sitt fyrste framlegg til valliste, skal lokallaga og medlemmer ha høve til å kome med framlegg og innspel til nemnda. Nemnda sitt fyrsteutkast skal sendast på høyring til lokallaga med rimeleg tilbakemeldingsfrist, før nemnda kunngjer sitt siste framlegg til valliste.

Nominasjonsnemndene sitt endelege listeframlegg skal vere lokallaga i hende seinast 14 dagar før møtet. Elles gjeld dei reglar for nominasjon og listeinnlevering som er gjevne i vallova eller i forskrifter til vallova.

Nominasjonsmøtet vedtek det endelege listeframlegget.

### **§ 6.3 Innkalling til nominasjonsmøte**

Fylkesstyret kallar inn til to nominasjonsmøte, eitt for Hordaland og eitt for Sogn og Fjordane. Kunngjering må sendast lokallaga seinast 30 dagar før møtet.

Nominasjonsmøte skal seinast haldast som eige sær møte på fylkesårsmøtet i valår.

### **§ 6.4 Samansetjing av nominasjonsmøtet**

Dei to valdistrikta har kvart sitt nominasjonsmøte. Nominasjonsmøtet vert sett saman etter same fordelinga som for fylkesårsmøtet. SU møter med 10 representantar der minst 3 av 10 må delta i eitt av valdistrikta, representantane må vere bustadsregistrert i valdistriktet.

## **Kapittel V: Partiskatt**

### **§ 7 Partiskatt**

Alle medlemmer som er oppnemnde i heiltids- eller deltidstillitsverv på grunnlag av representasjonen til partiet i fylkestinget betaler 10 % partiskatt av brutto til fylkeslaget. Alle valde eller oppnemnde med honorar eller løn som følgjer med tillitsvervet betaler 20 % partiskatt av brutto til fylkeslaget.

Ein skal ikkje betale partiskatt av tapt arbeidsforteneste og reisegodtgjering. Arbeidsutvalet skal godkjenne eventuelle unntak.

## **Kapittel VI: Andre reglar**

### **§ 8 Regionmøte for Hordaland og for Sogn og Fjordane**

Fylkesstyret kan invitere til eigne regionmøte for Hordaland og Sogn og Fjordane når fylkesstyret vurderer det som nyttig. Desse regionmøta gjer ikkje formelle vedtak. Det ligg til dei formelle organa.

### **§ 9 Ekstraordinært fylkesårsmøte**

Det skal innkallast til ekstraordinært fylkesårsmøte når fylkesstyret ynskjer det eller når lokallag som representerer 1/3 av medlemmene i fylket krev det.

Lokallaga vel utsendingar til ekstraordinært årsmøte i samsvar med kap. 1.

Ekstraordinært fylkesårsmøte handsamar berre dei sakene som det er innkalla for å handsame.

### **§10 Vedtektsendringar**

Vedtektsendringar kan berre gjerast av fylkesårsmøtet, og krev 2/3 fleirtal.

Endringsframlegg til vedtekter må vere fylkesstyret i hende minst to veker før årsmøtet.

## **§12 Tolking av vedtekter**

Dersom det er tvil om tolkinga av vedtektene, eller tilhøve som ikkje vert omfatta av desse vedtektene, gjeld vedtektene for SV - Sosialistisk Venstreparti.

*Vedteke 8. februar 2019  
Sist endra 9. februar 2020*